

陽春縣志

卷一上

民國三十八年己丑仲春

陽春縣志

樂昌張昭芹題端



陽春縣志序

秦通五嶺陽春隸南海郡屬邑梁置為郡唐置為州其後別立莫陽
銅陵甘東西城流南銅陵勤州富林羅水諸縣旋置旋廢明洪武九
年以陽春縣隸肇慶府相沿五百餘年原其始固一僻陋之區耳韋
提舉君載登宋淳熙二年進士肇啓文化明天啓二年梁吏部應材
繼之迄於清代人才蔚起其德行卓著崇祀鄉賢者有韋君載梁國
傑崔士暉梁崇伯劉啓銘謝仲坑劉榮玠七先生蓋駸駸乎海濱鄒
魯矣昔之宰是邑者以修志為先務始之者俞令文英繼之者張令
文誥康令善述王令博厚姜令山陸令向榮陸志與阮省志同出劉
太史彬華之手所謂擇精語詳者也然道光以還天道有災祥人事
有廢興政令有革新風俗有異尚行誼有足傳不可以無紀中經喪
亂文獻凋零非及時修纂何以信今而傳後哉甲子冬熙以邑人治
邑事奉省長修志通令商諸劉君傳羨柯君朝聰余君伯祥皆大贊
成爰於乙丑夏開始設局編輯採訪分別任事熙是冬解職寒暑六
更始脫初稿總纂吳君英華從事潤色於今觀厥成焉是書體例悉
沿陸志陸志所有者不嫌從同不敢沒前人之善也陸志所無者必
求核實不敢有杜撰之嫌也此則熙與編輯採訪諸君所堪共信者
也邑之人覽是書者聞風興起取法乎上策勵為純粹之儒修漸染
為淳良之風俗其庶足副海濱鄒魯之稱也夫

中華民國三十年十一月

前署陽春縣長藍榮熙序

陽春縣志序

邑志失修自嘉慶後已歷百餘載民國廿八年春余奉令來守是邑值廣州淪陷之後忙於抗敵準備鞏固治安簿書鞅掌未暇及於文籍也越明年治安既固與邑人士談地方因革與往古治亂興衰之跡索閱縣志記載僅及嘉慶深以日久失修為憾夫志者史也地域圖籍山川氣候建置物產所由紀典章文物風俗政教禮儀治亂所由載發幽啓潛彰道同風振敝起衰體要圖治縣志不綦重乎哉顧時移世易代遠年湮夷險厄塞今昔不同土風俗尚淳澆各異秩官選舉能無謬訛難考者乎節孝行誼能無湮釐莫辯者乎欲執昔日之縣志圖今日之治理為不可得矣自嘉慶庚辰迄今共歷一百二十有一年朝代既嬗政體亦遷典章制度迥殊人民思想遠別中間變亂相尋沿革靡常歲久失真尤不可不有所紀故重修縣志實為

二

治所當亟惟光緒十三年續修未刊民國十四年設局專修縣中宿學吳君實先生任總纂初稿已成記載止於清末亦未歲事去冬全縣行政會議遂有重修縣志之決議今年春適吳先生自恩平歸主續成舊稿稍補缺課畧事潤色即可成書時間人力兩俱節省民國部份則當俟諸續纂余聽其議乃設處籌刊時閱六月稿成付梓斯實吳先生之力也其於邑中文化之貢獻不亦大矣哉是志也類事體制悉本實齋誌例其於現代科學法則雖無微缺然而舊志章法已屬謹嚴其敘事也迄於宣統三年鼎革以還又三十年變遷既多可歌可泣之事尤繁未能輯錄至引為憾是則不能不屬望於方來迅加續纂也顧余更有不能已於言者春邑俗未盡淳民多固陋人存睚眦之見居處散漫易作走險之舉故治也易亂也亦易防微杜漸道德齊禮亂且治矣若姑息優容因循放縱星火燎然亂將立致

治斯土者可不慎哉至山川毓秀人物薈萃古今同然矣春之山擅雲靈射木之勝岩有崆峒凌霄之奇水獲大小二水之利稽諸往古嘗有英賢輩出嘉道間科名之盛且駸駸追乎上邑奈之何近百年來凌替耶邑地多山宜於森林誠能改蕭索蕪穢之舊觀成鬱積磅礴之氣概自能涵育朝氣蓬勃之人才樹木樹人兩收其效矣至若廣闢道路以利交通化險夷為坦途所以啓民智開茅塞也講信修睦敬老待長抑囂風除狹見所以明禮義正風俗也力事耕鋤墾荒造產用新知變舊法所以盡地利闢富源也利用天然以培風景開發岩洞而暢導遊亦所以盡山川之勝概也春之民其勉乎哉茲值斯志之告成吾且拭目以俟之

中華民國三十年十二月

署陽春縣長董載泰序

陽春縣志序

國家社會之文明進化奚徵乎科學究其所當然哲學明其所以然史學述其所已然也縣志史學之一也舉一縣之自然人文而詳序之太史公所謂述往事思來者可以觀風可以資治可以承先啓後促進文明其關係豈不大哉故孔子言禮必徵杞宋朱子出宰問志南康有由然也飛鵬於三十六年冬受命來縣管理衆事披覽嘉靖俞侯嘉慶陸令等志書往事瞭如指掌繼復諮諏賢達親巡甲里知陽春之聲名文物原志所載尚未精詳今秋薦紳吳英華暨李可瑤陳鴻藻劉經畫劉傳敷陳孟燮劉顯廉諸先生籌刊新志事畢付梓吳先生復以長治久安自無游民始相勗則知是志之旨不僅拾遺補闕已也夫陽春民俗樸厚文風之盛昔曾見稱於時然仍未能成爲海濱鄒魯者蓋以地處兩山之間盜賊易於逋逃變亂迭乘久安

四

未得重以水利未興荒瘠多生產少人謂陽春民食豐裕而不知吾民窮年胼胝齏粥鷄衣者之更僕難數也况乎交通梗塞文教未普科學未昌硯覩貧困弱昧之狀尚未能免是以縱有美質未臻文明賢如吳先生者能不感慨繫之其亟於修前志以勵來者用意深矣飛鵬以爲今日之陽春首應講武設防綏靖閭里以安之增進水源開闢荒野以富之理公款廣捐助改進教育以教之次則築路疏河使北出西江南通南海庶文化經濟發揚光大超越前人誠如是豈僅陽春之文明進步抑并國家社會之文明進步也是則斯志之纂修不爲虛耗矣飛鵬譎陋不文適丁其會願與邦人君子共勉旃

中華民國三十七年雙十節

陽春縣長康州鄧飛鵬

陽春縣志序

吾邑之有志自明嘉靖丙辰俞志始越三十三年而有張志越百年而有康志越四十四年而有王志越三十年而有姜志越六十三年而有陸志光緒二年蕭侯議修不果光緒十三年趙侯以續修屬劉孝廉德瑄李明經嶽稿成未刊邑人憾焉民國十四年藍侯奉大吏通飭重修聘予任總纂自維學殖荒落弗敢任然亦弗敢辭邑中諸君採訪編輯越六年脫稿郵寄廣州予困於案牘屬黃孝廉麟書襄助三年而脫稿方擬從事潤色開卷則輿圖缺如時志局已裁分纂劉君傳羨又物故商請測繪無應者竊以縣志為圖經輿圖不備不如其已在再數年而廣州事變起此是書之所以久未告成也三十年春歸自恩平董侯紆尊造訪敦促成書鄭君賢莘陳君禮祚允任測繪劉君鳳鐸允任校訂曾君佩周陳君孟燮羅君文川陳君鴻藻

五

劉君傳敬劉君顯容允任發刊予益誼弗克辭乃於案牘之餘點竄文字撰述序例六閱月而脫稿此是書之所以獲觀厥成也是書所載始於兩漢終於清宣統三年分類則以陸志為準陸志成於劉太史彬華之手取材宏富體例謹嚴為志乘傑作劉孝廉志稿悉沿其例採訪冊因之茲自嘉慶以前率仍陸志之舊道光以降以劉志稿及採訪冊足成其輿地沿革類增叙本末藝文類增錄專集則黃孝廉之力也輿地都里類增載六區建置增墟集團堡兩類則採訪諸員之力也事增文省深愧未能狗尾續貂之謂夫固知其不免矣予宦遊日久少時經歷不復省記坐對志稿如遨遊故鄉山水間如與父老談桑梓遺事故日事編纂不以為苦而於風俗之淳澆三致意焉聞之舊志曰春俗尚樸衣食儉嗇士知廉謹民不商販採訪冊則曰光緒以後寢尚奢華不特服制為然婚嫁喪祭亦侈靡成風以儉

嗇為耻不知邑人崇儉之德今果大異昔時否聞之陳峴曰習俗之
龐雜聞訟之蕃多亦嶺海之會居勢使然採訪冊則曰邑俗屬崇禮
讓邑民多奉公守法敬事長官故極少上控之案不知邑人好訟之
風又果大異昔時否然生財之術既疏則用財之途宜節量入為出
雖老生之常談實守富之良法門能戕身訟能破家尤願邑人引為
大戒也邑人其得毋以予為迂濶乎哉予因之有感矣天地清淑之
氣散布於山川鍾靈於人物吾邑幅員廣一百二十里縱一百六十
七里於山有崆峒凌霄之奇於水有冠溪龍潭之勝於人則有吏才
若謝仲玩觀察劉榮玠羅升梧兩太守詩才若譚敬昭農部互相輝
映為邦家光而竊怪近百數十年間以勳業文章稱於時者何少也
豈運會使然歟抑士狃故常俗趨媮惰而不自振奮歟是不能不屬
望於方來也已

六

中華民國三十年十月

邑人吳英華謹序

陽春縣志後序

著述與刊印孰難執途人而問之誰不曰難在著述哉雖然伊古多窮愁著書之士能刊以傳世者蓋鮮則財力限之也以一邑之財刊一邑之志宜若易易然光緒間志稿已成不克付梓中或為他事梗阻財力抑與有關焉吾邑向無公款五十年前設賓興印金局積資漸厚遇有大事故取給恒於斯二十年前曾撥助地方行政費刊志勢須另籌志局已裁無負責者董侯以是在辛巳春間有籌刊處之設是年冬陳君孟燮赴肇慶辛未書局訂刊甫成四卷而肇慶淪陷原稿由處保存不至散失殆亦有天幸耶乙酉冬邑人來穗漸衆因有同鄉會之設以次議及刊志但籌刊處餘款耗散殆盡在籌三年集資無着予患文獻之無徵而慮圖始之實難墊金圓券式仟圓為之倡理監事踴躍認購馳書告縣參議會皆大贊成改組籌刊處推舉正副主任股長股員各負專責鄧侯復撥穀式佰石助之沽穀得款匯交不足由予續墊是書觀成有日矣圖始之難如彼而觀成之易如此非意料所能及抑予竊維邑人吟賦之見無可諱言斯舉也無彼疆此界之分故能收群策群力之効此人心團結而邑事可為之一徵是可喜也事不可以無傳爰不嫌駢枝而序之

中華民國三十七年十月

邑人吳英華再序

張令縣志序

夫志何容易哉分野氣候上關天文也封疆風俗下繼地理也學校官秩士風吏治也禮儀兵防禋祀閱武也選舉賦役仕籍氓數也名宦鄉賢表裏人物也他如祥異迭見物產生殖狼狽興滅之由纒纒具載其中譬如按內經之書百品羅嘗採武庫之積劍戟森列誠邑治大典也顧操觚摛詞貴公以核徇毀譽者勦雷同之說任胸臆者豎聚訟之幟牽合附會則郢書而燕說沿襲差訛則亥豕而魯魚嗟志何容易哉誥跼踏簿書自涖任以來夙夜兢惕惟恐吏治不效以速官謗稍公餘退食則僅僅以文籍自娛淬兒肄業耳顧蒿目蓬心奚志之敢第思邑志重典嘉靖丙辰歲令尹俞君初修嗣是經亂物故沿革不常幸今大征綏靖闔治甫張借不輯而修之曷垂不朽哉故不揣猥庸不憚勦襲而志之草焉懼散也奚辭僭妄昔漢世遷

八

固氏蒐羅百代勒為一書說者謂其質而實詳而有體而是非抵牾猶有遺議焉如此乎志之難也今司訓羅君宿學偉識文行公器鄉先生耆年宏抱藻鑑精明而邑校諸友又習之傳聞騰之物議他日太史執簡鑿坡視草當必託袞鉞於一字寓勸懲於片語者敢不敬加參訂如分門未妥則合附不為煩如比類未肖則分別不為異何者當增何者當削何者當詳何者當畧何者當存迹以俟後之究竟何者當新定以弭後之爭端山藪奇節未盡建明則顯微而闡幽宦蹟吏治未協公評則核駁而糾論然後申之公案壽之梓編以垂永久則春邑之光也諸君子參訂之力也誥庶無越庖乎哉是舉也遍借舊志僅得一部簡序已失而按修文廟一欸志端有硃批云重修文廟大石皆出於甲里而修志秉筆之人謂其捐俸何其誣也按城隍廟一欸志端又墨批云嘉靖二十四年知縣潘相重修廟宇獨遺

其功而不志夫後之視今猶今之視昔也此硃墨二批果出核實誠
修志者之遺議也借修而筆之者不相矛盾則硃墨之跡猶足警惕
修志者之將來也茲惟互相考訂協贊成書毋俾見議如昔則誥幸
矣萬歷戊子邑令張文誥撰

序內羅君宿學偉識文行句當有脫漏

陸志云張志久佚惟存此序見康志序中所云舊志蓋嘉靖中俞
志也明黃佐廣東通志載陽春縣志五卷俞宗周撰攷舊志縣令
有俞文英無宗周疑宗周即文英之字耳

康令縣志序

皇上首出御極化被海外廓古今版圖所未有因詔纂輯寰宇一統志蓋欲一道德而同風俗至鉅典也一統志該各省省該其屬府州府州該其屬縣縣志不綦重乎陽春邑志自明萬歷以來幾百年餘歲久日深板刻燬失康熙十一年奉檄修志倉猝未有成書兵燹之後副本無存述守茲土政暇即與紳士討論邑乘每欲續修而未遑會奉憲遵承部文重修邑志述會集學博紳士廣採旁搜編摩校讐不敢限以時日懼考核之未詳而事多舛訛也不敢不集衆思懼聞見之不廣而事多缺畧也多士曰志者識也識其大復識其小區太史嘗言之矣今以百年之殘缺遺文故老蒐羅維艱畧之則事蹟弗備幽微弗彰邑之典故泯如也郡志通志何所於稽考乎詳之則繁稱細瑣卷帙浩繁不無濫觴之誚為詳為畧何去何從體裁須歸於

十

一述曰輿圖疆域山川阨塞此千百年不變者也然得無昔險而今平昔僻而今衝者乎風俗歲時此與時變通者也然得無昔淳而今澆昔盛而今衰者乎則壤成賦戶口丁徭今昔皆然矣何以昔行之而民日以殷今行之而民日以困也學校選舉秩官易代皆然矣何以謬訛相沿姓名湮沒無從稽考也分野則縣與郡可按籍考也輿圖疆域則道里之遠近可稽也問荏苒可虞兵防之備禦無患乎問水旱不常水利之灌溉幾何也至於天道變於上人事應於下不可不書也禮儀祀典之不厭其備也物產必求其明且悉也名宦人物之不厭核其真也得其真可以照耀史冊雖多而不厭其詳也不然者魚目混珠和璧疑石積行之士必不藉此為榮矣凡此所宜詳不宜畧者也宜詳而不詳則為鄙若乃藝文雜記則從畧無詳可也不宜詳而詳則為汎抑述更有進焉春邑五里彈丸文獻無徵非若通

都大邑有聲名文物之盛可以炫飾觀聽也則與其畧而寡文不若詳而可考古者列國有史凡里俗皆得綴集以備太史採擇今之志古之史也縣志不綦重乎哉僅析其義例為綱者十有八為目者五十有奇分理修輯屬事摛詞越三月而書始成語曰千金之裘非一狐之腋則小邑俚言或亦有助於高深云述也不文幸藉手以告無罪焉爾如曰一道德而同風俗恐非下邑小吏之所能為也康熙丁卯邑令康善述撰

陸志云康志為邑舉人劉裔煇拔貢生梁墜歲貢生劉大鏡歐陽志學李承運伍燧附貢生楊公俊監生劉裔端汪演忠生員黃應虬梁宜中謝茂松張鑛汪世炫梁型梁埠張錦梁偁殷鼎張蔭星劉家峻張鑑同輯凡十八卷

王令縣志序

邑之有志猶國之有史也考古成周太史陳風而輜軒所採四方之貞淫奢儉政事得失莫不達之王朝以佐治理迨易封建而郡縣周官之法不行漢建武中詔修風俗一書厥後華陽有志人物有考後之君子踵其遺法凡職方所隸疆域人民官師貢賦謠俗嗜好益詳上以是察治下以是採風是志之作也其即史氏之遺意乎國家鼎建百年仁風翔洽我皇上神靈天亶丕承鴻業凡左右大吏暨良二千石咸宣布德愷覃敷遠播道德齊禮之化幾於無外特命直省郡縣修輯志書登之史館以昭一道同風厚東魯下士叨承簡命攝篆春州甫下車得與博士薦紳共襄盛典爰是搜覽羣書廣徵耆舊採里巷之傳聞訪潛德之實蹟以前志為規模參之省志府乘舛錯者訂正之掛漏者輯補之疊見者刪削之邇來數十餘年教化日新風

十二

俗丕變前之險谿隘谷今則坦道康莊也前之烽燧乍熄今則雞犬嬉遊也前之科目寥落今則多士聯鑣也至於英賢之挺生藝文之藻發孝節之炳烈春雖叢爾哉亦足以垂不朽何莫非聖天子道隆德備之所陶鑄乎生斯土者固沾化育即厚操鉛學製亦大有慶焉若夫土風俗尚間有不齊樸華奢儉時有沿革川陵消長橋樑遷復時有遞更亦歷歷載之用告厥成爰付剗厠厚自慚寡陋不免抱殘守缺而一時公論出其中萬世之公論亦出其中盥毫祇慎祈不背史氏之遺意免貽譏於大雅也雍正庚戌邑令王博厚撰

陸志云王志為邑舉人劉宗湘譚予芳拔貢生劉家楹恩貢生梁宜中歲貢生張鑒劉裔沂王嘉猷梁美中梁璿林振泮劉家峻貢生謝成勳生員劉家坡梁曰鑿梁斗星陳應球劉家正朝黃晃伍銓揭友璿陳廷琛李國球梁正呂珠柯一藥謝萬才劉宗泮張淡

梁坦朱國俊嚴干文林維甯同輯凡十七卷

十三

姜令縣志序

春邑建置始於唐之武德四年其後分析合併沿革靡一至明之洪武九年以陽春縣隸肇慶府嘉靖丙辰前令俞君文英始修志厥後張君文誥修於萬曆戊子康君善述修於康熙丁卯王君博厚修於雍正庚戌此書已三纂矣顧其地隨時轉風與化移迄今又三十年踰時既久詎惟是秩官選舉節孝行誼漸有積薪之勢懼其久而將湮耶山川疆域且有昔是而今非者守土者執當日之志書求今日之治理其不膠柱者幾希重修之議烏可不急講也昔朱子守南康甫下車即詢郡志君子謂其識治體余待罪越四年迨聞調而始議及非曰緩也舊志中有宜存者有宜去者有宜更正而變通者余數載於此或於諮詢所及而有採訪或於車舟所至而有經歷或於張弛所加而有興革皆志要也乃集邑紳而告之曰今可以言重修之

十四

事矣爰於歲之九月延仁和呂邦堂先生博古君子也秉筆總裁與邑中公明之士若教主講謝孝廉輩旁搜遠覽苟確有得於所見與所聞與所傳聞衆猶謙讓而未遑者筆則筆削則削知我罪我余固弗敢避焉四閱月而稿成雖不敢與通都大邑之紀載爭奇然以謬承諸前令後條而列之彙而纂之文損於前事增於後為綱為目燦然備舉用是付諸梨棗於以宣揚聖化固不特山隅僻隅有以彰一道同風之盛而亦為後之官斯地者舉事不誣經世有憑豈僅為一時之文獻已哉是為序乾隆戊寅邑令姜山撰

陸志云姜志為浙江仁和明經呂伊編邑舉人謝以光拔貢生教
泰貢生李燾柯爾常吳昌偃劉世槐監生梁文海生員柯日旦黃
朝賡嚴而泰陳舜源教震謝叅光嚴而溫陳開五儒士黃朝文同
輯凡十六卷

陸令縣志序

志者何道政事之書也親民之吏不周知乎人民及地域廣輪之數與夫山川之險易土地之豐嗇風俗之淳澆德行道藝之所宜書政教之所宜事雖欲圖治罔識體要矣余奉檄知陽春甫下車竊效紫陽氏之急先務詢邑志覽之頗病其蕪陋思重加蒐輯以簿書鞅掌未遑也夫闡幽發潛以勵風化興利除害以厚民生志乘所關良鉅顧言於下邑有難焉者春之為縣亦古矣唐宋之世宜有記載書乃列史暨諸家藝文著錄於嶺南古郡縣為圖經為錄為記所在多有而陽春闕如撰志者僅從史志得茲邑山川民物大概若李氏元和志樂氏寰宇記顧氏方輿覽勝諸書即通都大邑猶未能家有藏本矧僻壤乎舊志沿訛無從是正此攷古之難也一邑政典詳於官書卷牘綦繁裁擇匪易又半遭蠹蝕本末弗完此邦一二工文章鍊時

十五

務之士其言亦堪為文獻徵然著述無多十僅得一其他所見異辭所聞異辭所傳聞又異辭益髣髴不足依據信今傳後之作而援里巷雌黃之論以為不刊未見其可也此徵今之難也余因是兢兢不敢率爾授簡無何制府阮芸臺先生有纂修通志之舉檄下所屬郡縣採訪事實余既述邑事崖畧上之省局而邑人士復以修志請余曰語弗詳擇弗精亦無當也時番禺劉樸石太史方總撰省志爰以藁介請筆削焉太史乃取舊志正其體例芟其龐蕪訂其訛舛補其缺漏余適卸篆旋羊城相與商榷成書凡十四卷事增於前十之三文省於舊亦十之三余幸斯志之成而於春之民有厚望也春之在古固推結之俗茅蠹之區也風氣寢開衣冠弦誦彬彬如蔚如今則掇科第紆組綬者踵相接於朝先民有言仕宦之鄉陶染成俗宜若莠民皆薰德善良無有譸張為幻者乃風俗之淳轉不逮昔豈土壤之